

Dezan avan, an 1982, yon jou, bò zòn dizè nan maten, Wodòlf te akonpaye ak de lòt etidyan Dwa zanmi li yo, te antre nan ba a kòm dabitid, pou ale refè lestomak yo. Men Wodòlf nan foubi zye li, te fini pa remake gen yon dam, yon kliyan Che Kami, ki t ap gade li osi lontan, nan yon koudèy admirab. Toutfwa, nan boukantaj rega yo, Wodòlf te vle jwe wòl jènjan galan li, limenm asontou, te kite li plonje nan rega enkonni an avèk cham. Yo tou de te pran kontanple youn lòt nan kat zye ki te chaje ak kapris. E se konsa, po ji ki te nan men dam nan, rive sòti tonbe atè. Tousuit, dam nan te revandike kont Wodòlf:

- *Si zye w pa t ap fikse m, misye,  
Po ji m nan pa t ap sot tonbe.*

Wodòlf te eseye reponn:

- *Tande koze! sa se yon blam  
Si m pa t ap fikse w, chè madam  
Po ji w la pa t ap sot tonbe?  
Se yon chay ou vle ban m pote?*

Dam nan te replike bay Wodòlf:

- *Chak jou m vin la a, m achte byen pwòp  
Se pou premye fwa sa rive.  
Se paske ou t ap gade twòp  
Ki vin lakoz men m pran tranble.*

Alò nan yon souri, Wodòlf te reponn li:

- *Kòman w fè wè ke m t ap gade w  
Si toutfwa ou, pa t ap gade m?  
Se vre, zye m kab tonbe nan zye w  
  
Men mwen, m pa kite sa twoubler m  
Nou pa bezwen al jiskobou  
Si w vle, mwen kab peye l pou ou.  
Kòman ou rele, pale ak mwen.  
Sanble, ou pa rete twò lwen?*

Kè dam nan te vin pi soulaje, li souri tou, li di:

- *De mwa ankò pral fè m katran  
Depi mwen nan Ozval Diran*